

Qilalukkat nipinut illersorneqarnissaat siunertaralugu kangerlunni qaqortat qernertallu sivisunerusumik najortagaanni angallatit aalajangersimasut ingerlaartarnerisa killilerneqarsinnaaneranut periarfissat misissoqullugit Naalackersuisut peqquneqarnissaannik Inatsisartut aalajangiiffisassaattut siunnersuut. Misissuineq UKA2021-mut naammassineqarsimassaaq iliuusissanillu aalajangersimasunik siunnersuutitaqassalluni.

(Inatsisartuni ilaasortaq Jens NapätôK', Partii Naleraq)

Akissuteqaat

(Suliffeqarnermut, Ilisimatusarnermut Avatangiisinullu Naalackersuisoq)

Siullermeerneqarnera

Naalackersuisut sinnerlugit Inatsisartuni ilaasortaq Jens NapätôK', Partii Naleraq, siunnersuut saqqummiussaa pillugu qutsavigaara. Siunnersuut nunatsinni uumasut najortagaannik illersuinissamat soqutiginninnerput pillugu tikkuussivoq, sumiiffiit taakku pinngortitami isumalluutinik taakkuninnga inuussuteqarnissamat periarfissatsinnut pingaaruteqarmata. Matumani qilalukkat qernertat qaqortallu umiarsuit nipiliornerinut illersorneqarnissaat pineqarpoq.

Ataatsimut isigalugu uumasut najortagaat Naalackersuisunit pingaartinneqartorujussuupput. Uumasut pigisatta pitsaasunik atugaqarnissaannut, aammalu sumiiffinni piffissanilu ajornartorsiorfiusuni pisariaqanngitsumik akornusersorneqannginnissaannut qulakkeerissaagut. Sumiiffiit taakku piaqqiorfiusinnaapput, nersutit piaqqiorfigisinnaavaat imaluunniit sumiiffiit uumasut neriniarnerinut pingaarutiliusinnaapput.

Uumasut najortagaat amerlasuut eqqissisimatitsinikkut illersugaareerput. Assersuutigalugu timmiaqarfiit, nannut sisii aamma sissat aarrit majortarfii sumiikkaluarunilluunniit eqqissisimatitaapput. Aamma sumiiffinnik eqqissisimatitsiviusunik arlalinnik, ilaatigut uumasut uumanerminni pisariaqartitsillutik najortariaqartagaannik peqarpoq. Assersuutigalugu Qimusseriarsuarmini pinngortitamik eqqissisimatitsiviusoq ilaatigut qilalukkanik qernertanik nannunillu, sumiiffimmi tassani neriniartuusunik erniortunillu illersugaavoq.

Qilalukkat qernertat qaqortallu nipinut malussajatorujussuupput. Taamaattumik najortagaat pingaarnertit, assersuutigalugu umiarsuarnit sinersorlutik takornariatitsisartunit nipiliortoqarnissaanut illersorneqarnissaat pingaaruteqarpoq. Aannersuit pigisagut qilalukkanut imaanilu uumasunut miluumasunut allanut pingaaruteqarnerpaasarput. Aannersuit tassaapput immap sikuani imartat ammaannartut. Aannersuit ilaatigut Pikialasorsuarmini aamma Ittoqqortoormiit Kangerluata anigguani nassaassaapput. Sumiiffinnut taakkununnga kangerluit sinerissallu arlallit, qilalukkanit qernertanit neriniarfigineqartartut aasakkullu erniorfigineqartartut atasuupput. Qilalukkat qernertat uninngaarfigisartagaat pingaarnertit tassaapput Inglefield Bredning, Qimusseriarsuaq, Blosseville-p sineriaani Kangerlussuaq, Ittoqqortoormiit Kangerluata qinngua aamma Dove Bugt. Qilalukkat qaqortat Canadap avannarpasissortaani uninngaartarput. Qilalukkat qaqortat ukiuunerani Pikialasorsuarmittarput, aammalu Kalaallit Nunaata kitaata sineriaa sinnerlugu sikip sinaavaniittarlutik, maannalu tamanna umiarsuarnit angallaviuallaanngilaq. Qilalukkat

qaqortat Tunuminngaanneersut Svalbard-imiit ikaartuupput, taakkulu Tunumi aalajangersimasumik uumasuunngillat.

Ittoqqortoormiinit aamma Tasiilamit piniartut ilaannit oqaatigineqarpoq, Tunup sineriaa sinerlugu umiarsuit sinersorlutik takornariartitsisartut angallateeqqallu akornusersuingaatsiartartut. Piniartunit oqaatigineqartartut malillugit umiarsuit kangerlunnut pulasarpur, aammalu imaani uumasunut miluumasunut piniartunulluunniit piniariarsimasunut qanillingaatsiartartur, taamaalillutillu uumasunut piniarnermilu kulturimut akornusersuisarlutik. Umiarsuit angallannerinut maleruagassiuussinissaq Kalaallit Nunaanni qilalukkanut qernertanut, taakkulu aasisarfiinut, akornusersorneqarnissamut malussajanerpaaffigisaannut akornusersuisarnermik annikillititsinissamut sakkussaasinnaavoq pitsaasoq.

Suliassaqarfimmi tassani suliniuteqartoqarnissaanik pisariaqartitsisoqarnera pillugu Naalakkersuisut siunnersuuteqartoq isumaqatigaat. Kisiannili Naalakkersuisut ajornartorsiut qulaajaaffigalugu suliaqangaatsiareerput. Taamaattumik allamik nalunaarusiornissaq pisariaqartutut isumaqarfiginngilarput. Kommunit tassunga attuumassutillit, biologinik aamma najukkani aalisartunik piniartunillu Naalakkersuisut suleqateqarlutik maannangaaq qilalukkat qernertat umiarsuit nipiliornerinut illersorneqarnissaannut suliniutissanik aallartitsissasut, Naalakkersuisunit siunnersuutigineqarpoq.

Tamanna tunngavigalugu Naalakkersuisut allannguutissatut siunnersuummik imaattumik saqqummiussaqrput:

”Naalakkersuisut nalunaarummik, qilalukkat nipiliornermut illersorneqarnissaat siunertaralugu angallatit aalajangersimasut kangerlunni, qilalukkat qernertat aasaanerani siviunerusumik najortagaanni angalasarnerinut maleruagassiuiffiusumik suliaqarnissamut peqquneqassapput.”